

05 SEP 1997

Mahathir-Rasuah

SEMUA AKAN MISKIN AKIBAT RASUAH, KATA DR MAHATHIR

KUALA LUMPUR, 5 Sept (Bernama) -- Rakyat hari ini diingatkan mengenai bahaya rasuah yang akan mengakibatkan prestasi pembangunan negara merosot dan "semua menjadi miskin".

Perdana Menteri, Datuk Seri Dr Mahathir Mohamad, berkata apabila rasuah menjadi budaya bangsa, kos semua perkara merangkumi urusan kerajaan hingga ke pengeluaran barangan atau perkhidmatan dan harga jualan, akan meningkat.

"Semua akan menjadi miskin walaupun memiliki pendapatan yang tinggi kerana segala-galanya mahal," katanya dalam ucapan dasar Presiden pada perasmian Perhimpunan Agung Umno di Dewan Merdeka, Pusat Dagangan Dunia Putra (PWTC) di sini.

Presiden Umno itu berkata: "Mereka yang terlibat dengan rasuah juga akan menerima akibatnya, kerana mereka akan hidup dalam negara yang mundur dan miskin dan mereka akan dipandang hina oleh rakyat dan bangsa-bangsa lain".

Beliau berkata rasuah akan menyebabkan semua kerja mengambil masa yang panjang dan tidak ada ketentuan dalam apa juga urusan baik daripada segi kos atau masa.

Dalam ucapannya, Dr Mahathir menjelaskan secara terperinci bagaimana amalan rasuah boleh membawa kehancuran kepada negara apabila gejala itu menular hingga kepada Menteri dan Perdana Menteri serta sektor swasta.

Beliau berkata rasuah akan menyebabkan orang yang tamak, yang tidak bermaruah dan tidak layak, dipilih menjadi pemimpin parti dan kerajaan.

"Orang seperti ini tetap akan menyalahgunakan kuasa untuk memperkayakan diri semasa memegang jawatan dan untuk menentukan ianya terus disokong.

"Rakyat akan disogok dengan duit kerajaan yang sepatutnya diguna untuk pembangunan negara, untuk kesejahteraan rakyat dan kebahagiaan hidup kita semua," katanya.

Perdana Menteri berkata segala-galanya akan menjadi mahal kerana elemen rasuah perlu dimasukkan dalam semua urusan.

"Budak pejabat pun boleh memaksa dirinya disogok untuk pelanggan mendapat sesuatu. Dan mereka yang di atas, tidak akan melarang budak pejabat menerima rasuah kerana mereka juga ingin bahagian mereka.

"Dan seterusnya hingga ke Menteri dan Perdana Menteri. Orang atas ini yang menerima sogokan yang diketahui oleh semua pegawai dan kakitangan tidak mungkin melarang dan mendisiplinkan sesiapa di bawah mereka," katanya.

Dr Mahathir berkata segala kos urusan dengan kerajaan akan naik kerana sogokan kepada semua peringkat -- pegawai, kakitangan dan Menteri.

"Kemudian bank pula akan terlibat dan kos modal dan segala pinjaman akan menjadi lebih daripada hanya kos faedah. Sogokan kepada pegawai-pegawai bank yang dikenali sebagai "football money" amat berleluasa tidak berapa lama dahulu.

"Apabila sesuatu barang berkurangan dan sukar didapati, sogokan diperlukan untuk mendapatkannya walaupun daripada peniaga. Demikian juga dengan semua khidmat penting, baik dari kerajaan atau swasta," katanya.

Dr Mahathir seterusnya berkata rasuah bukan hanya satu daripada amalan budaya yang boleh menghancurkan negara kerana banyak lagi amalan dan nilai buruk lain yang harus dihapuskan juga.

"Tetapi kita tidak boleh pasif, hanya melindungi diri daripada yang negatif. Jika kita ingin maju, kita perlu merancang dan melaksanakan strategi yang boleh memajukan kita," katanya.

Beliau berkata ramai juga yang berkata "kita sepatutnya berpuas hati dengan apa yang ada pada kita malahan ada yang mendakwa keadaan kita sudah ditakdirkan dan kita bersyukurlah".

Beliau memberi contoh ungkapan "rezeki secupak tidak akan menjadi segantang, kemiskinan di dunia akan dibalas dengan kekayaan di akhirat. Kehinaan di dunia akan dibalas dengan kemuliaan di akhirat" sebagai antara nilai buruk.

Oleh itu, Perdana Menteri berkata semua dakwaan itu harus disangkal.

Perdana Menteri berkata sikap tidak mahu berusaha bersungguh-sungguh, mudah puas hati, cepat membazir dan mengejar keseronokan yang ditegah menunjukkan masyarakat belum menerap nilai mulia yang mengutamakan maruah lebih daripada melayan nafsu.

"Kemewahan sedikit yang kita nikmati sudah pun meruntuh akhlak kita dan generasi muda kita. Mereka melepak, terlibat dengan bohsia, mengguna dadah dan sebagainya.

"Apakah kita yakin yang kemajuan yang telah kita capai kini boleh diteruskan oleh mereka yang mewarisi kita?" tanya beliau. -- BERNAMA

MOK NAK